



Uschiglio n'ha l'Hom Strom nagina bratscha. Per far reverenza al Böögg han quests scolars zambregià ina poppa.

FOTOS C. CADRUVI

# Hom Strom – sco in cusseglier federal

■ (anr/vi) In fraidischem di ha l'Hom Strom tscherni per far visita a ses collega zürigais, al Böögg. Ma l'Hom Strom n'ha quai en sasez betg disturbà. El n'ha insumma betg schelà. Persuenter han ils mats e las mattas da Scuol stuì tegnair la dira. Ier da buna ura da las 7.00 era l'Hom Strom anc ina pitga da nov meters lunghezza ed in mantun strom. Igl era fradaglia en las giassas da Turitg. Ils scolars da la terza secundara e reala da Scuol, Ftan e Tarasp n'han perquai betg pudì laschar pender las alas. Els han stuì ord las plimas e festinar. Damai ch'i fascheva tri-d'aura han ils responsabels decidì da far l'Hom Strom sut ina punt damanaivel da la Rudolf Brun-Brücke. Pertege l'Hom Strom na dastga betg vegnir en la plievgia. Il bletsch na faschess betg bain ad el. Lura na pudess el betg arder la saira cura ch'el ha ses meeting cun il Böögg. E gliez fiss bain ina blamascha.

## Chantar en tutta fradaglia

Tranter las 8.00 e las 9.00 rodlan ils scolars l'emprima vetta strom sin la pitga: Cun il strom fan ins l'emprim ina cua. Lezza sto esser rodlada bain, per ch'ella saja stagna. Igl è era impurtant che la cua vegnia plegada bain sin la pitga. Quai dat in bel muster, in pau sco ina tarschola.

Ils scolars lavuran ensemen cun ils magisters e las magistras. Ma era il president da vischnanca Jon Domenic Parolini sa metta en la ritscha e smatga e zuola. La ravarendessa da Scuol Eveline Saout è medemamain da la partida.

Tuttenina cumenza la cumpagnia a chantar la chanzun da l'Hom Strom che *Men Rauch* ha scrit. I vegn chantà en pliras vuschs. Malgrà la canera da traffic e malgrà il vent che misla, traglischan ils tuns. Els stgaudan. Sch'els na stgaudan betg la temperatura, lura almain l'atmosfera sut la punt.

## In pur grit

*Balser Biert*, anteriur magister, ha era acumpagnà la gruppa. El enconuscha bain l'usit. «En sasez èsi in'ianza pajana», declera Biert. Els pajans faschevan cun l'Hom Strom ina offerta al sulegl ch'era per els in dieu. Cun quest'unfrenda leva la gliעד far buna luna al sulegl per ch'el gidia a far buna raccolta la stad. «Sch'il vent mida pliras giadas direcziun durant che l'Hom Strom arda, san ins ch'i dat in bun onn», declera Biert.

Pli baud gievan ils uffants a rimnar il strom tar tut ils purs da Scuol. Biert sa regorda anc da quai. Ina giada aveva la giuventetgna emblidà da dumandar in pur. Tut en rabgia è quest pur arrivà tar la giuventegna ed ha sdramanà in bratsch strom per terra. E pertege era quest pur uschè grit? La risposta da Biert: «Anc da quel temp era mintga pur persuadi ch'el na fetschia betg buna raccolta, sch'el na possia betg contribuir insatge per l'Hom Strom.»

## Strom per 2500 francs

Oz na semnan ils purs betg pli seghel e graun en l'Engiadina. E là nua ch'ins ha anc champs da graun fan ins cun il

strom directamain ballas. Ma cun strom da ballas na pudess ins betg far cuas. Per far l'Hom Strom dovri strom lung ch'è tshuncà a maun.

Il pur *Anton à Porta* cultivescha perquai aposta in prà cun seghel a Scuol. Uschiglio fiss l'ianza probabel daventada l'unfrenda da la maschinaziun dal puresser.

Il strom dal champ dad à Porta tanscha sa chapescha be per in Hom. E quest onn hai duvrà per il Sechseläuten anc ina segunda purziun. Ils organisateurs han perquai stuì ir en tshertga da strom lung. Chattà han els quel tar ina firma da decoraziun che furnescha strom a stizuns da flurs. Var 2500 francs ha quest strom custà.

Ils experts ladins èn da differenta opiniun davart la qualidad da quest strom. Els ins manegian ch'i saja ina buna qualidad. In scolar di: «Il strom ha anc si spias. Igl è atgnamain donn da duvrar quel per far in Hom Strom.»

## Quel da Scuol è pli bel

A bun'ura han ins anc dubità: Tgi sa, sch'il strom tanscha?

Da las 11.00 è la terza vetta rodlada sin la pitga. Quai basta. L'Hom Strom fiss uss pront, era sch'in mat remartga: «Noss Hom Strom a Scuol è pli bel.»

Ina crana vegn e dauza quest «pruoder» sin in char. Suentermèzdi vegn il char tratg da chavals sin il Sächselüteplatz. L'Hom Strom fa pia part dal cortegi, sco la prominenz turitgaisa, e sco sch'el fiss in cusseglier federal.



Igl è fitg fraid. Tuttina fan las mattas bellas cuas.



Flurin Prenner (sanester giun plaun) fa la ragisch. El caveglia bain il strom per la cua.



Igl è impurtant che las cuas vegnan rodladas stagn e smatgadas ferm vi da la pitga.



Uschia èsi perfetg.



La crana dauza l'Hom Strom sin il char.



Severin emprenda da ses non da far cua.